

毘陵集





毘陵集卷十四

宋

張

守

撰

誌銘

徽猷閣待制贈左正議大夫陳公墓誌銘

公諱戩字冲休建州松溪人保寧軍節度掌書記傳正之孫贈奉議郎希正之子也母葉氏歸寧外祖朝議公夜夢朱衣吏導金章紫綬者入謁旦而生公少英邁不羣崇寧初貢于太學中乙科授懷州司理治獄平允郡太守賢之事多資決屬縣得盜上之州獄公察見其冤



而尉挾姻黨之貴私請于公公正色曰殺無罪以希賞安乎遂釋之人益知其賢有旨跨大河繫橋以便北使公私病之守以訪公公曰兩朝通聘問百年未嘗以無橋爲病是必小人貪功幸賞然州縣論之必以爲避事也第飭有司寬期會以須必有指其失者已而兩河之民訴于朝役遂寢其料事明審如此除鞏州教授時童貫宣撫五路氣燄赫然方借寵賢德以取名然小迂意則禍辱隨之部使者薦公于貫公稱病不出或勉公一往見以遠禍公曰內侍怙寵市權吾所切齒也忍復見

其面耶朝廷聞而嘉之移處州教授未至除國子博士收宣教郎連丁內外艱終喪還朝權諸王府記室事上濟邸上踐尊極進官四等除虞部員外郎尋除監察御史車駕幸浙江前將軍范瓊捍金無功剽殘郡邑擁兵上流徘徊觀釁朝廷以爲憂公上疏請詣瓊趣使入覲從之單車至豫章徑造其壘瓊整兵列戟而後見屠剝人以懼公公神觀自若徐曰盛衰治亂何代無之漢唐亦皆中興況聖主勇智度越前代而又宵旰圖治注意將相將軍宜戮力濟難以遺澤于子孫垂名于竹帛召



命之至當效郭汾陽朝聞命夕引道也瓊猶豫不決公復曰將軍不見苗傅劉正彥乎稱兵叛逆不旋踵而敗願將軍熟計之瓊翻然改容具朝服北嚮謝恩亟趨行闕公入對上勞問喜甚曰潛邸舊僚行擢用矣進官除戶部員外郎未幾拜太常少卿金人犯浙江扈蹕之永嘉上疏論事無所回隱其畧以爲兵將用命則寡可以敵衆不用命則多適以致敗今之握兵柄秉旄鉞非闖茸卽跋扈也國之典刑不能加之將將之威令不能施之軍宜申嚴紀律使進退左右惟命之從則敵可破

也又謂守令非人或賄賂敗官或庸懦失職或貪功生事漢宣帝每拜刺史守相輒親見問有名實不相應必知其所以然唐太宗于都督刺史皆臨軒冊授後不復冊猶受命日對便殿本朝守土之臣得召見者七十有三州紹聖初節鎮守臣竝賜對外除者必先入覲而後之官願令節鎮守臣除罷皆引對上嘉納除徽猷閣待制兼侍講每人侍必從容進說嘗謂艱危之時宜循名責實以興治功論東晉之失以譏切時病所上疏無慮千百言賜告展省還朝除給事中益感激論事知無不



言除授失當多所論駁士論浩然歸重時諸將握重兵有尾大之勢公論古今兵制以謂御營兵分隸諸將在某將則曰某將兵不復知有天子朝廷宜稍損益其制于是創號神武五軍始爲天子之兵矣又論齊桓晉文漢高光武皆身當矢石以集大勲願陛下躬耀神武收功馬上則將士賈勇而醜敵知懼後上疏論五失其一謂執政尚寬厚示大體務姑息其二謂寵任將臣輕授之柄遂使冒功邀賞怙寵市恩至謂本兵大臣出其門下其三謂臺諫願望朝廷交結權倖毛舉細務以塞責

其四謂郡守監司身自犯法豈能律姦其五謂內侍之權漸盛附結將帥瀆亂紀綱恐臨安之變生于不測上歎獎其言有詔臺諫侍從陳保民弭盜遏敵生財四事公上疏其略謂省徭薄賦敦本厚生爲保民之道用光武策聽盜自相糾擿以追捕多少爲守令殿最爲弭盜之術占上流據形勢爲遏敵之策躬儉節用量入爲出斥內庫之藏以歸太府爲生財之計上納用之敢奉隆祐太后有司費出無節公上疏謂陛下念太后保佑之勞社稷之勲務極追崇而有司觀望輒因權宜敢奉而



援異時園陵之制典禮失當中外竊疑他日歸祔泰陵將復用何禮耶內有都大監領以闡寺爲之而提點按行之屬復異其名外有總護使司以大臣爲之而頓遞修奉之類各設其所辟置官吏增加俸給賜予宴犒數亦不貲至謂會稽之山無可採而欲取他山之石廂祭之卒不足用而欲調諸郡之夫竝緣爲姦騷動州縣又況梓宮僅取周身明器止用鉛錫而有司夸侈如此豈不違太后慈儉之遺訓而失陛下崇奉之本意乎由是蒞宮一切鑄省論辛道宗不當除副都承旨編修官王

銓不當改官又論諸將造政事堂與大臣狎昵紊亂朝綱恐緩急不爲用于是樞臣上章待罪諸將亦岌岌不自安人頗爲公危之公曰論事職也獲譴宜矣天子知公之忠公亦力請宮祠而弗之許也遂除寶文閣待制知處州慰遣加渥至則守法奉公政尙簡易吏民畏愛之時苦亢旱下車而霑足人以爲隨車雨云移守四明民遮道借留幾不得去四明新殘屯兵防海道異時郡守畏懦姑息犒賜無度歲入不能繼而兵益驕公私憂危公至裁定多寡之數久近之節將士有過失一切以



法從事于是軍政立而民始安身雖在外而政事得失密疏論之大臣頗不悅而公恬不恤也久之以建州數被盜姻族散徙力丐就閒上乃移公守泉州以便其私既至鋤姦發伏豪右惕息泉自軍興歲入不足以供軍費賦十而加五六貪吏乘時虐取而民不堪命公止收十一爲鼠雀之耗經理關市而收其贏總覈盈虛而節其費亦不卒乏事會范忠肆竊松溪妻令人悸卒聞訃痛悼復累章求外祠遂提舉建州武夷山冲佑觀觸熱還鄉感疾致仕卒于建州之水南僧舍乃紹興三年六

月十日也享年五十三積官至左朝議大夫疾革自草遺表以聞上嗟悼贈左通奉大夫娶吳氏封令人二子鼎右承務郎次飛舉進士三女長適右承務郎監潭州南嶽廟任寶臣餘尚幼公資純孝承顏不違曲盡子職間遠去庭闈未嘗廢甘脆之奉居喪不踐戶庭赴急難調匱乏惟恐後俸入分姻舊不爲後日毫髮計留也人有餉予輒卻不受閨門雍睦內外無間言季兄早世撫其孤猶己子孀妹百指攜挈于官下復推貲產予之胸次曠達接人恂恂不與物忤至立朝則慷慨盡言毅然



不可奪也然壽僅踰半百未究才具而齎志以歿可哀也已諸孤以五年正月丙午葬于建安縣崇聖院之山下吳氏耐焉邦人李公彥敘公爵里行實請銘余頃長御史公寔爲僚余備位二府而公又進用于時知之爲詳敢辭銘曰

治極而溢政柄失授伊優在堂孤雄束味皇綱失紐萬目隨弛天矯橫鶩禍越古始睿明中興蒐攬遺直寢饋龜鑑甘腴藥石矯矯陳公逮事潛藩騫翔禁途克昌其言罔避權嬖忠而能力連章累牘展盡丹赤連牧三州

風績有聞胡不永年究其經綸佳城同穴公安于歸惟公不忘斯銘不欺

太孺人時氏墓誌銘

太孺人時氏故贈承事郎嘉興陳公獻臣之妻監察御史確之母也年十八而歸聰敏絕人遇事迎解奉姑周氏恭以勤待姻族無親疎莫不滿意御下嚴而有恩婢妾慰且懷閭內肅如也經理生產業不避寒暑承事遽于醫務以藥石濟人而家事置不問姑且老于是喜曰自婦入吾門吾心泰然矣太孺人躬菲約辛苦以助成



其家然好施予雖服用物視人有欲得之色則不小靳也篋中常蕭然歸十有七年而喪姑又三十有三年而承事下世既專內外斬斬一如姑與承事無恙時晚年事付諸婦有不能決必資太孺人一言而定衆皆歎其不及遇勝日必修具命家人訪佳山水以自適諸子環侍笑語彌日不倦清尚之趣殆不類女子云御史通朝籍遇宗祀恩以紹興五年二月受封而其年十二月二十日無疾而卒享年八十有二明年正月十有七日葬于嘉興象賢鄉深葉村之原祔承事之墓子男八人長

未名卒次公明公峻法昭爲浮屠氏公暘公晦公曜而確其幼也惟公暘公晦確奉大事餘皆先太孺人而卒女四人長適陸璋次吳堯佐次楊汝霖長與季亦先卒仲女早寡不再嫁孫男二十一一人女十有九人已嫁者七人曾孫男十人女四人承事天資醇厚業醫而不利其貴鄉人稱長者先娶馬氏早卒壯未立嗣再娶太孺人而毓衍如此嘗謂承事曰自入君家資用粗饒羣兒戢戢他日所乏者非貨也況君以醫活人多陰功其後必大恐不當僅仍故業承事曰是吾心也始命確從師



讀書于是弱冠取科第起家而學行詞藻爲時聞人擢  
監察御史引疾請外提點江南東路刑獄餘皆修飭有  
立兄弟孝友諸孫亦彬彬知文藝族大而睦中外無間  
言里閭有鬪鬪者其父母必呵之曰汝不媿陳氏家兒  
耶太孺人素無疾歲時子孫上壽綵衣盈庭長幼序列  
膳羞豐甘慈顏懌舒御史亦不樂遠宦多從諸昆侍左  
右壽祉康樂世亦鮮其比矣曾祖供備庫副使祖廉左  
侍禁父允不仕世爲安樂著姓父從侍禁至淮南生太  
孺人于真州遂爲揚子人攷其行應銘而御史頃官余

里中從余守越復在幕府知之爲詳以狀請銘其可辭  
銘曰

孰婦非順鮮正而義孰母非慈鮮賢而智夫人有家爲  
世才婦亦既有子爲世令母其德弗愆惟家之肥巖巖  
御史一鶚騫飛孫曾環旁蘭玉茂蔚旣壽而康逝不以  
疾惟公陰德啓其慶源卜隣起家以成其天表于鄉閭  
備福全美繫銘幽室以信彤史

宋故孺人邵氏墓誌銘

奉議郎致仕詹公成老卒之明年妻孺人邵氏亦卒旣



葬十有一年孤來泣且訴于余曰必明不天併失怙恃  
窀穸卒事久而未銘大懼先君子先夫人之事實泯絕  
于不肖孤之手重不肖孤之罪敢以死請余曰某從先  
公游且親已誌公墓矣于夫人敢辭乃爲之言曰邵氏  
其先吳興人乾符中右補闕安石以吳興卑墊徙常之  
宜興曾祖靈甫祖藏父宗回皆隱居不仕孺人鍾愛于  
父母不輕以予人公方英妙鄉譽藉甚貴人右族爭以  
女歸之公不爲意獨以邵氏女賢有聞又羣從光剛如  
叶相繼登進士第學行著稱因願交焉二家始平章各

意滿卽以配孺人天姿靜淑入門事尊章曲盡恭順接  
姻族恩意周洽中外賀曰詹氏得賢婦矣歲時祭其先  
必親臨修具四女姪姪如己出諄諄誨以女工婦道女  
懷其慈以母事之識慮精敏遇事迎解公臨官有疑或  
謀之孺人則從容指說悉中理宜自奉菲約不喜華靡  
誦佛書日不輟夜諷祕咒施餓鬼食風雨疾病不渝也  
數有異應自書觀音偈心念不空過五字于經行坐臥  
之地人初莫能曉及感微疾夜分索粥已興坐斥遣婦  
婢曰吾欲少憩遂枕臂側臥而逝當盛夏膚理如生異



香襲人皆以為好善奉佛之證云寔宣和三年六月十七日也享年若干一男即必明二女適具雲張宏皆進士雲先卒孫男惠迪允迪孫女適張庭幹蔣天友孺人至孝居家事親先意順適既歸詹氏安問一月不至則憂見顏間逮從公宦游去庭闈益遠寢食不自安髮為盡白父母歿屏葷茹苦日常七八以終其身平生容色莊重不妄語笑聞人之善若出諸己至過惡絕口不言救急難濟貧乏竭力弗少靳故死之日囊無餘貲必明以其年九月二十日與公合葬于晉陵縣定安鄉求仲

村下城之原銘曰

處而孝歸而正字而慈信上下睦內外具壺儀外百骸反真宅契圓機播清芬詔有永銘斯垂

墓表

從仕郎臨安府錢塘縣令贈宣教郎朱君墓表

建炎三年冬金人犯錢塘縣令朱君死上嘉其節贈宣教郎而官其二子明年孤大廉等奉其喪葬于湖州安吉縣安福鄉之郎灣後十有三年大廉以行實狀泣訴于毘陵張某曰先君子之死節太史氏必不沒其實矣



惟是葬踰一紀而無銘學行志業與夫死事之始末未及知之不肖孤夙夜是懼宜得當世聞人表于墓敢請余曰先君余友也將何以辭遂以狀證所聞而書之嗚呼金人初犯中原大將握重兵者往往聞風而靡矣州縣吏或引避或迎降無復施一矢出一語以抗者方其越天塹犯建業蹂桐川而窺臨安也君乃慨然請于郡太守曰賊逼境宜戍千秋獨松二嶺以扼其喉徐定守禦之計守嘻笑曰吾城可保吾人可戰否乎君變色曰如公言十萬戶赤子可若何或謂此戍江濱卒耳非金

人也願得半紙書往諭之不然當緩頰以款敵使杭民爲逃死計則某死亦其所也守媿其言許之于是檄錢塘仁和捕盜官率弓手土軍卽日就道同僚或勸止之君曰此書生報國之日也策馬不反顧行二十里而遇敵始知爲金人猶驅部曲以進矢集如雨我兵潰君兩中流矢不能騎左右掖至天竺山而鄉民有識君者曰吾邑大夫也輿致于西溪敵人四略君裹創率里社以短兵邀擊再至再卻卒遇害寔二月十九日也嗚呼君之死可謂知所處矣君諱蹕字子美姓朱氏世爲安吉



人朱氏出自曹姓顓帝之後周封其苗裔曹挾于邾爲魯附庸春秋後八世爲楚所滅子孫去邑爲朱氏世居沛國自質子禹坐黨錮誅子孫有避難丹陽者三國時故鄣八治輔吳有功封毘陵侯後徙封故鄣今安吉卽其地也至今烝嘗于安吉而朱氏爲大族君曾祖而上隱于農大父璘始起家爲池州青陽尉父南強從仕郎知越州上虞縣始高祖某有智識嘗自謂其後必大稍遣子孫官學于是諸父從兄及從仕繼踵登進士科然皆仕不達君少有大志力學思自奮厲以充其宗亦累

舉始中政利上舍第授興國軍教授除辟廡錄出爲河東提舉學事司主管文字三舍法罷去河南教授陞從仕郎丁內艱卒喪除河東雲中府路經略安撫司準備差遣改荆湖南路轉運司主管文字易京西皆不行會金人大入京師戒嚴天子命吏部侍郎王蕃爲京畿制置使挽君寘幕府突未黔敵薄城下蕃跳襄陽坐罷君籍制置司金帛告敕等亟上之且爲蕃申理人皆賢之上卽位駐蹕維揚近臣薦其才召赴行在所除太學錄君每歎主憂臣辱之時欲効尺寸報國不樂爲校官丐



使金國會遣宇文虛中報聞余爲殿中侍御史被旨撫諭京師遂挽君偕行時道梗公欣然戒途間關賊盜兵戈中相與爲存亡抵京師則金人渡大河破滑臺都城晝閉君略無悔懼意還朝復除太學正甫半月而敵騎至矣大駕南渡朝廷稍欲用之而君詣政事堂曰縣令近民類非才而民被害願得一邑自試遂除錢塘令治行有聞上自建康幸吳越呂丞相諸公薦對余因論前日撫諭屬官之勞故事當得賞有旨轉一官皆未及行而金人南渡矣死年纔五十有一紹興改元四月壬午

穿其妻史氏墓而合葬焉三娶先史氏次沈氏後賈氏四男大廉右迪功郎監衢州都稅務孝廉右修職郎鎮江府司理參軍士廉思廉皆從學三女長適右承直郎台州黃巖縣丞潘莘次右承直郎添差台州司戶金安雅次進士練紀二孫男尚幼君資孝友從事及兄疾衣不解帶嘗徒走數百里訪醫于他郡事繼母呂氏如嫡居家和訓子嚴鄉黨急難無親疎身任其事少以功名自期遭時艱難憂國如飢渴而志不少伸以死命也夫

神道碑



宋故贈太子少師劉公神道碑

資政殿學士權同知三省樞密院事劉公自贛上走使數千里狀其先官師之行寓書于某曰珣不天逮事先君子之日淺不肖孤無以顯揚明德之懿忝以遭遇三朝躡登侍從既又視秩二府數幸以恩追賁于九原位二品矣法得立墓隧之碑而紀實刻詞未有所託君其寵嘉之庶幾侈上恩表先懿薄不肖孤之罪敢以泣請某竊自念官師之歿諫議大夫陳公瓘誌其墓矣諫議一時偉人片言之重固已發幽光垂不朽寧復假寵于

不腆之文乎敢辭既而請益篤不獲命則敘而書之曰公諱定國字平仲世爲湖州長興人曾祖文奎不仕祖承福贈太子少保父涉贈太子少傅母陳氏贈齊安郡夫人公幼警敏讀書綴文不煩督厲日開月益受詩書易于安定先生胡公瑗初名傳旣壯則有安定國家之意出應進士科改今名一舉于開封府再舉于太學旣不偶退益刻礪未嘗一日去書不觀自司馬遷班固范蔚宗等歷代史韓杜詩文皆成誦以至百家之言如醫經地志各究大指文辭雅健詩句尤清美所交皆名人



魁士時譽翕然桐川太守胡公幾孫公覺皆以禮致公  
主鄉校後學師仰之元豐末以五試禮部策于廷秦陵  
初政大臣欲稍更熙寧元豐舍法而迎合者不計利病  
欲盡變乃已公獨極論利病因革數十條皆切于事情  
人稱誦之授某官調通判司戶參軍率職不懈歲饑郡  
守廩餓者公主給予檢柅吏蠹拊摩罷羸人蒙實惠後  
指公謂曰生我者父母活我者公也秦州瀕海歲苦旱  
議創管引水公私持異議不決部使者以委公公卽  
究知利害所在置三十餘所迄今便之凡職所當爲不

擇劇易也一時鉅公交薦其才工部侍郎賈公易尤知  
愛之工部在言路得公所條時政十事以聞時論稱善  
元祐五年七月感疾一日置酒會同僚慘然有惜別意  
呼子丕丕珪屬後事且勉以立身大義無一語亂卒于  
官乃二十二日乙酉也享年五十有五囊無餘貲同僚  
共贖之丕辭不受曰義不傷先人名明年三月甲申葬  
于其縣之尚吳鄉赭山少傅塋南百步娶巖氏婦道母  
儀著聞姻黨間先公十年而卒始葬齊安之墓左後舉  
以祔公兆子男五人丕至

案此下似脫十數字

太學生贈承事郎



噩早世噩迪功郎主管潭州南嶽廟珏資政殿學士朝  
散大夫權同知三省樞密院一女未嫁而亾孫男九人  
唐賓唐叟龜年唐俊唐牧唐稽唐舉唐任唐暨唐賓通  
直郎唐稽承務郎唐叟龜年早世孫女四人曾孫男四  
人曾孫女一人珏尤以學行忠信表于搢紳出入三朝  
備著賢業公歿之二十六年而珏爲國子博士以郊祀  
恩贈宣義郎繼歷臺察郎省累贈公至通議大夫又除  
龍圖閣直學士贈通奉大夫除吏部尙書贈正議大夫  
建炎三年金人內侵天子巡吳越分百司之事于洪州

置三省樞密院以總焉上親擢珏今職仍御宸翰賜之  
俾視二府于是贈公太子少師而嚴氏爲新興郡夫人  
公資孝友少傅臥病且久公方成童侍疾不解帶者踰  
年少傅薨號毀如成人廬墓左終其喪少傅藏書萬卷  
創橫經堂于家圃凡三從子弟皆肄業焉公卽堂南建  
善繼堂掇古賢遺事可以訓者筆于屋壁一時聞人賦  
詩自丞相公布而下凡三十餘篇公尙氣節人有過必  
面折之至其屈抑力爲伸救賑卹貧匱赴人之急惟恐  
後友人霍孝光死京師公挈其柩以歸左班殿直李演



卒于通州官下三司副使陳經之女弟歸顏氏而亡公皆爲收瘞如禮凡親故貧不能嫁娶喪葬者公身任其事力不能及則率同志助成之至其持身則廉介有守不妄取予浮屠慧通者嘗爲鄉豪所誣幾坐法公爲直之浮屠夜攜白金謝公公驚曰我以義免汝于難何遽輒汙我耶浮屠媿謝而去每稱慕范希文義莊之美意命諸子曰他日有餘力必爲之今置珎市田給三族蓋公之志也公挾才具旣不克施用雖家居常以利物爲急邑有平遼尚吳二瀆及李氏埭漚圯不修邑多水患

公率鄉黨浚築又爲石梁以便往來邑人德之號劉公橋始公兄弟起家惟仲兄早世餘皆登科季兄揮弟誼尤以學問文采顯于時公獨不遇而死然有劉公載張公舜民沈公括等哀挽之詞有陳公之碑以紀其平生而資政又以德業贊建炎之政則公之不遇而死固有以示後世矣某宣和中嘗與資政同爲御史至建炎又同爲侍從嘗歎服資政之賢而知其所自故書公之實且系以詩曰

身窘一世以仕則豐仕困下僚以德則隆旣闕其志且



吳鼎雯校

嗇之壽天積善慶以大厥後根植既固枝幹茂碩是似  
之賢翊贊艱棘騫翔華塗亦既顯揚累恩追榮有燧其  
光東宮之師登秩二品琢詞大隧用詔億稔

毘陵集卷十四

毘陵集卷十五

賦

小黃楊賦

余几案間有黃楊生拳石杯水間有年數矣蔚  
茂可愛喜而賦之

維黃楊之挺生表奇姿于弱植蟠霜根之數寸竦貞幹  
之盈尺濡兩掬之清泉占一拳之怪石攬以蒼翠之雕  
珉培以光明之碎礫朝假寵于陽暉夕蒙滋于露液受

宋

張

守

撰



一氣之獨正紛衆葉之多碧已幸脫于泥塗靡爭妍于  
 花實安微分而自足貫四時而不易實之函丈之間綽  
 有山林之適明臆淨几陰敷硯席笑昌陽之瑣細與草  
 芥而匹敵謂巴苴之凡陋望秋風而隕路二物皆植水中能生故以  
爲傲冰霜之凜列玩陰陽之消息配後凋于澗松得全  
 生于社櫟雖蒙厄于閨餘初不辭于屈抑已無心于梁  
 棟之用矣母或縱尋斧以求狙猿之杙也

五言古詩

方時敏倅濬歸浙江待次送行

嶷嶷玄英孫聞風自鄞川

方爲慈溪尉余丞  
定海聲迹常相聞

謁來茗書

間王事亦復聯相遇一傾蓋論交卽忘年開口見城府

落筆生雲烟尋春五亭岸釣月雙溪船杯行各酣適箕

踞忘拘牽放辭發奇偉搜句窮鑿鑿我時怯欲降退壁

常自堅俯首試外臺一矢雙鵬連聯鑣仲與季三秀來

差肩羣雋爲辟易拱手不敢前折箠破大敵未足煩戈

鋌風低忽垂翅信命付諸天公飛東陽曷我訪蘭亭賢

雙魚數流問五馬方薦延攝事古山陰晤語復粲然禪

心扣空寂蔬飯捐葷羶一洗盡玷缺皎皎尺璧圓繼從



甘陵遊假道仍周旋飄零我蓬轉渠敢自意全邂逅鳳  
凰闕公亦仍迤邐宦學舊輩行金狨覆文鞵以及後來  
秀青雲各聯翩公方駕別車去卽三山顛俟期卜吳越  
寄跡無一罍尚及秋風殘飽膾鱸魚鮮我陋不足數生  
理亦可憐爾來犯不韙策足英俊躔文羞白羽扇中豈  
青銅錢家風故不惡蹇步徒加鞭迷途得蹭蹬奄奄如  
寒蟬別公起歸思端欲驅其先經營一囊粟攀附嗟無  
緣擗耳聽知音拂拭朱絲弦一札行亦馳兩槩定復還  
闊步白玉堂一揮筆如椽

貴溪道中寄信州夏蒙夫使君

薄晚雪逾密助寒風更顛長塗客衣薄僕馬僵不前綠  
林軫玉食渠敢歎獨賢行喜見故人羈懷得披宣冰花  
散渺莽玉樹爭清妍遙知坐歎餘鈴齋聳吟肩

再和

六花照老眼令我喜欲顛頃刻萬株玉巧趁春風前竚  
立聽風謠誦言使君賢不事廚傳飾皇化憂不宣相見  
雖蒼顏妙語加韶妍小邗猶射鼠安用彎黃肩

來詩過有稱譽再和



任重非所勝位高憂疾顛歸耕半頃秋榮枯付樽前來

作江南牧衰謝媿五賢郡有陳蕃范滂韋丹等祠號五賢堂喜聞復故境

中興頌周宣賢能不復遺紆餘定為妍勿笑百僚尾三

署會須肩趙暇為太常博士有詩云何日肩三署終年尾百僚蒙夫亦自奉常補外

謝孫仲益察院借示詩卷

客游跨兩春曾次飽塵滓無人抉河漢為我一浣洗故

人富清製放筆如翻水此間渺無津滂沛到筆底長鬚

遣大軸光采照牕几我時食對案驚喜失筋七風雅間

何闕稍復聞正始滌除塵想滅肝肺挹清泚早年上金

閨氣摩諸彥壘風斤運無旁四座羞血指駸駸跨驄馬

奔輪不容柅負大難為力得坎聊復止熙辰崇盛典潤

色待東里風雲吐憤鬱事業振奇偉餘暇賦天台金聲

追祖禰

洪慶善提刑罷官過建康惠詩和答

若人儒林秀俊聲自孩提振鬣日千里眾眼驚月題盍

登要路津獻納蘇黔黎聊乘使者車枳棘非鸞栖戢翼

下吳會客路秋風淒弭帆江之濱歸夢先若谿寄傲水

南北忘懷玉東西況乃味禪悅已知昔途迷坐笑老婆



禪杖拂勞提，斯祇應浩然氣。中宵吐虹霓，功名儻來逼。  
未免雲衢躋，祇今寵辱際。淵澄看旋鯢，龍鍾秣陵守。短  
髮那勝篔簹，邂逅見臺臺。野鶴羞凡雞，言句謝筌械。未易  
窮端倪，歸來見詹尹。寧復問突梯。

題王巖起樂齋

靜者悅山林，夸者慕鍾鼎。人生各有適，所樂滯一境。王  
郎超世姿，名教得深省。窮通付風雨，一笑萬累屏。閉居  
祇疏水，開卷味自永。從事雖賢勞，游刃失繁肯。此心故  
休休，閱世徒耿耿。開軒理松菊，留客辨果茗。得趣地自

偏無塵，可尤警他年。觀出處，廊廟卽箕顛。

澄懷菴

蔡詩中與君云云當有爲某人標識或卽  
連屬前題因永樂大典分韻錄載脫去

憶昨避寇亂，與君連一牆。別來幾寒暑，杳如參與商。君  
與喪亂際，徜徉水雲鄉。十年林下夢，不到聲利場。結菴  
劣容膝，不爲大盜藏。此懷那須澄，已作冰雪涼。花竹供  
四時，飲水樂未央。何當謝塵鞅，解纓濯滄浪。

嵐光臺

雲山屹長空，烟水湛深淥。築臺萬象表，領略在吾目。凝  
嵐翠欲流，澄光炯堪掬。盡洗纓上塵，長照杯中醪。



四達亭

此亦脫去  
爲某人題

胸中浩無旁吞納九雲夢高懷有所寄亭中亦空洞涼  
月侵風樞寒烟逼曉棟達人意有餘未許俗子共

題閩丘氏巢鳳亭以其子登科胡茂老名之

令君命卿家一經世遺子煌煌丹桂枝寂寞踰五紀竭  
來山水縣闕館貯書史竹梧森翠碧鸞鵠自停峙翩翩  
丹穴雛一鳴驚衆耳絳羽覽輝翔百鳥各披靡英姿凌  
雲氣玉頰編貝齒唾手取青氈父老爲驚喜寧無英妙  
年亦或拾青紫上堂拜重慶此事世無比勉哉尊所聞

烟霄千萬里五斗暫折腰百鍊無繞指矯翼儀舜韶作  
瑞明光裏來者翫茲亭甘棠同勿毀

和曾宏甫告別兼簡幕屬

奉詔辭北闕把麾到南州向來政已拙老去語更媮條  
教雖屢下劓痍何時瘳猶喜豺虎息稍解聖主憂英英  
幕中彥紅蕖汎清流袖手聽婉畫藥石兼珍羞衰遲雱  
櫟姿萬一桑榆收吾人南豐秀未應仄席求飄泊乘別  
車惠然肯來游周旋見家規會合非人謀清詩日礪琢  
不厭枯腸搜束書赴嘉招掉臂不我留我無青玉案何



以報所投從茲謝沮洳龍門看吞舟

何循校

秦楚材和六一先生秋懷因次韻送別

拖釁久羸疾兀若槁木枝別離故作惡未別意已悽况  
此清商時木落水潦歸艤舟話心曲未了舟欲移借問  
何匆匆直恐違官期念此登臨意何止騷人悲子行不  
可留子鬢殊未衰痛飲置人事江上鱸魚肥

客居聞鴈有感

涎涎社燕尾噉噉霜鴈聲兩物巧相避寸陰不得停我  
來燕未歸倏見鴈南征客游何當還節物凜可驚哀歌

撫長缺獨夜羞短檠念營堂上巢媿爾飛冥冥

常山神祠

籃輿破霜曉駕言郡城南雲山爲好色風日仍清酣古  
祠據山腹深堂靜潭潭我來何所禱禍福久已諳頑冥  
亦天資乞靈謾懷慙同來得我輩勝處思窮探爽氣排  
俗慮濁醪侑清談臥碑一拂拭古鏡開塵函斯人已仙  
去寒泉獨清甘扶藜山嶠崒放目窺渾涵前瞻羣峯翔  
九仙駐飛驂後俯歸路迷城郭埋烟嵐北望郡城在杳霭中平生  
丘壑姿回首不我堪歸來耿不寐青燈對書龕



姚志道有書輒不借戲呈

我來春未動兀坐秋忽老客懷飽世味塵土不容澡尚  
 餘筆硯癖俯仰半華皓中年得異書夜諷或至卯爾來  
 口生棘妙語時耳剽故人吾臭味囊帙富細縹什襲祕  
 不傳凜若璧在趙念茲訪逸遺從人掇殘藁何當發其  
 藏困廩一傾倒窮途百態惡歸思疾飛鳥終當餽所有  
 共此絕代寶歲晚同吟哦乘風上蓬島

七言古詩

客居坐無茵褥賓至常苦之戲作

廣文坐客寒無氈少陵人來坐馬羈胸中富等千戶侯  
 不使囊中餘一錢嗟予久客貧到骨兀坐長恐藜牀穿  
 才名未踏兩公闕窮愁何遽容爭先畫餅端知不餽口  
 筆耕輒亦遭無年媿無文茵薦佳客促膝危坐如寒蟬  
 君不見漢朝博士能說經五十餘席輪載憑又不見袁  
 尚索席藉凍地不意頭顱行萬里空榻蕭然亦安穩得  
 失榮枯付天理金狨覆鞍容墜傷禍福由來相伏倚

題舍弟舒嘯亭

不羨高門聯甲乙欲傍林泉老蓬華田間築室路三必



亭子蔭茅簷四出春霖竹牖上蝸牛夏夜藜牀吟蟋蟀  
 茅亭雖小容舒嘯丘壑胸中故超軼晨牕晚徑足披風  
 細柳脩篁長障日閉關已作柴桑趣況有腴田供種秫  
 客來共醉甕頭春長嘯一聲百憂失遙想妖氛纏象魏  
 忍見風塵侵警蹕勿學蘇門真避世要似武侯時抱膝  
 我紆郡紱病且衰欲報君恩老無術簪裳未覺柴柵殊  
 鼓吹殆與池蛙一簿領幾回迷老眼況復伸眉縱狂率  
 已慙成瑨功曹諺空憶劉琨胡騎逸遐想東臯落成處  
 欲往從之足雙桎夢君琢句俯清流春草池塘到詩律

便應投紱賦歸來肯待子平婚嫁畢

題畫

二松偃蓋勢曲拳二松竦幹凌風烟霜姿舒卷全于天  
 笑看草木爭春妍杖藜誰子行蹢躅欲渡略約迴溪船  
 令我清夢歸林泉章江流駛行可沿

和族叔祖古風

去年謝病辭黃屋夜夜鄉心夢相續今年罷郡理菟裘  
 喜在家庭廁蘭玉阿翁年德冠吾宗時親典刑聽約束  
 懷奇終待玉三獻世路不堪珠九曲愛酒惟憂北海空



居貧不作揚雄逐如何疏糲肯淹留不爲盤飧爲宗族  
忘懷一醉見天真窮達寧煩詹尹卜歸作長歌寫悲壯  
千載騷人可奴僕客星在天翁莫愁赫赫太陽升若木

送提刑劉嶠解印還朝二首

贈君吉水麝煤之玄玉毘陵兔穎之毛錐玄玉磨研勝  
點漆毛錐揮洒如印泥增光纏龍之大字煥發吐鳳之  
英詞玉旒光邊借前箸便好再勒中興禱  
贈君西蜀衛生之藥南臺送別之詩藥驅陰邪葆貞氣  
詩敘平昔同襟期願言加餐錫難老念茲分袂送將歸

時有平安寄來鴈慰我別後長相思

次韻范寥孟冬大閱之什

承平不用衛與英赤子頻弄潢池兵貔貍向恃七閩險  
尋孛欲翳三辰明吾皇南顧念凋瘵舊臣雖老堪一行  
奉詔褰帷問瘡痍一意摩拊無他營爾來松溪掃遺孽  
卒歲不聞枹鼓鳴九農豐登四郊靜孟冬大閱張軍聲  
摩天金鼓動霜曉井鉞色正參旗橫羽箭犀利七札薄  
鐵騎馳突一鳥輕是日射鐵帖頗多中的而申世景鐵騎尤精銳戰士人人逞  
驍儁猛將一一懷忠精吾軍如此粗可用縱有綠林何



足平蜀公之家雄洛京人物接武多名卿天涯邂逅見  
典刑豈止一善宜盱衡胸中韜鈴想餘事筆下文采嘗  
知名登場縱觀重感慨那得萬騎聽使令通和息戰固  
下策自古三王猶有征得君耆艾將神武定看卻敵賢  
長城

豐歲行

庚申年秋自  
豫章赴會稽

早禾飽熟收山場晚禾碩茂青吐芒五風十雨作豐歲  
一飽何以酬蒼蒼牛遭癘疫大半死挽犁豈誇人力強  
妻兒翁媪共耕鑿勤勞有此一稔償人言穀賤三農傷

我喜不乏三軍糧邊騎長驅自送死卒致一怒煩君王  
將軍輸忠士賈勇獻俘獻捷來相望忍令戰士有飢色  
努力收斂輸太倉勿言無以飽妻子須知餓死勝兵死

五言律詩

晚霽獨坐戲呈周元舉劉希范許少伊同舍諸兄  
二首

吏散無人跡風回掃積氛虛涼簷際得遠響靜中聞樹  
色深留暝爐香細裊雲此間應有句端合與君分  
疾風迴急雨碧瓦散晴氛幽趣何人共微吟得自聞扶



歸隱集 卷五 何循校  
筇翻倦鳥岸幘送歸雲病惱新涼夕孤斟負十分

出郊奉祠

薄霧林花潤微風沙水清鴻歸心共遠鷗泛眼偏明寸  
祿秋毫累分陰尺璧輕滄浪端可濯藿食了餘生

題潤公看經室

潤公看經室山氣翠霏霏花雨當軒墮松雲入座飛鑿  
池泉繞甃採木露沾衣欲覓三山石空慙心賞違

元舉希范見和佳篇皆有懷歸之意頗合鄙趣因

次元韻

湖海關幽夢峯巒想翠氛詩囊閒事業禪衲舊知聞白  
簡留任助立文付子雲飛潛俱有適物理聽羣分

撫屬游君病起惠詩次韻

蛇影沈杯裏牛鳴震坐旁晦明生癘疫神物護忠良喜  
復神明舊閒便日月長關心一枰上黑白已分行

王承可惠官字韻詩次韻二首

才疎空許國老去謾爲官長病同立晏多言媿嬾殘歸  
心隨贛水愁眼望桑乾自笑髮如鶴羞看鏡裏鸞

昔年留建業授館廁嘉賓忝竊慙高位淹留有故人相



逢青鬢在誰信白頭新晚歲良田熟東阿豈謾云

獲從樞密徐公游者累月雖接名理不敢言詩念

揮斤般郢之門古人所誦也日者惡語流傳不圖

徹聽過蒙獎譽形之篇什輒復次韻敘謝

詩壇推宿將一諾重千金長怯雷門過惟堪澤畔吟數

篇真謾興三歎忝知音佳句如傳法慙慙渴心良喜

和王巖起惠二詩

頻年分將闕那敢厭麤官花著雙眸暗霜侵兩鬢殘四

郊纔罷警七澤忽憂乾時方未報君恩重清高媿伯鸞

勝流還入幕賢否數嘉賓超婉畫無遺慮佳言更可人

中郎才簡亮開府句清新淥水稱佳麗于今不足云

和答少伊

秋雨厭煩濁清詩靜垢氛向來佳句法不遺俗人聞少

前此不和和氣回霜簡閒心付嶺雲只應明主眷符竹未容

分少伊卒章有衣袂惜將

獨夜耿耿至旦蚤作偶書

久客迷歲月勞生念斗升寒侵風卷幔夜靜月窺燈暗

穴鳴飢鼠晨牕上凍蠅起來看鏡嬾種種髮鬢髻



野飲途小所作

斜日明官柳飛紅綴客衣隔林鶯對語掠水燕爭飛野  
飲聊排悶羈懷得解圍言歸歸未得今昨兩俱非

胡已茂端明同年挽詞二首

孝友終身篤詞章一世英艱難扈行在憔悴老承明歸  
院花驪影趨朝革履聲一麾隨逝水塵迹想平生

道德文恭竝才猷修簡親中庸漢伯始清獻晉平春望  
襲高華胄身終侍從臣不諧三老約華屋總帷新公嘗

謂及余為同年三老之約歸里社相從竟不遂



正何循校

毘陵集卷十六

宋

張

守

撰

七言律詩

送秦楚材使高麗二首

齋鹽太學鬢先秋乘興聊爲汗漫遊  
戲把漢旌行絕域不因邛竹取封侯  
波神侑飲鯨翻鱗海雨催詩蜃吐樓  
不獨雞林傳好句會看弭楫上瀛洲

學士風流異域傳幾航雲海使南天  
不因名動五千里豈見文高二百年  
貢外別題求妙札錦中翻樣織新篇



淹留卻恨鷓行舊不得飛觴駐蹕前

送提刑劉嶠解印還朝

老懷欲別已辛酸再歲周旋瞬息間誰遣暮潮催兩槳  
卻應清夢挂三山功名不許淹行色談話何時復解顏  
鷓鷯行間如借問爲言衰謝合投閒

紹興丁巳以大禮館客恩奏族叔祖有詩見戲次

韻和答二首

少室山中計已成臥看朝市等蠅營對門山雪惟詩思  
過眼秋雲卽宦情長恐搢紳嘲捷徑勿緣升斗誚虛名

翁看肉食顏如甲何似村醪一笑頰

衣冠相望兩卿家列鼎當年辦咄嗟後裔不應猶短褐  
除書未怕失丹砂恩光謾欲霑宗族品秩何勞問等差  
莫笑青衫同畫餅也勝辛苦踏槐花

送仲并倅湖州

仲時攝帥  
司機宜

佳麗江山得共遊一時賓主亦風流鳥飛魚泳青油幕  
虎踞龍盤白鷺洲坐席未溫俄告別題輿催上莫淹留  
茗溪尺五烟霄近入手功名不自由

伯恭侍郎自吳門謝事有詩和者無慮百餘人矣



且命屬和不可辭次韻

滄江洗盡眼中埃飽看江山句更裁風引前旌如挽去  
山迎歸棹欲飛來捐軀許國憂心在袖手還家笑口開  
應笑龍鍾豫章守沈迷簿領日回回

次韻張輝惠詩三首

詩鄰可卜擬誅茅好句人間見一毫吟就鉢聲應未絕  
流傳紙價頓能高謬成燕雀追黃鵠已作蜻蜓避伯勞  
清夜月牕裁警句霜梧風竹助蕭騷

投老須營一把茅晚親珠玉看揮毫賦此絕敏驚曹植

刻鵠無成媿伯高已放閒身栖寂寞時憑佳句洗塵勞  
喜逢載酒經過客老去無心作反騷

老依背郭蔭堂茅寒夜微吟自削毫羨子筆迴霜氣勁  
驚人句與月魂高極知蹇足追隨苦便覺長鬚走送勞  
因識盧郎是佳器定能痛飲誦離騷

張子華作詩誤川事有詩訟其過因次元韻

咳唾成詩未許攀腹中應著綺千端畫蛇思巧因饒足  
倚馬才高肯駐鞍割肉固非方朔社蒸壺曾入老盧盤  
小瑕不掩千金璧能事寧容俗眼看

子美以東方朔割肉為社日東坡以



鄭餘慶蒸壺  
為盧懷慎

王承可再示次韻

為僚東越肯忘年南越相逢兩皓然  
杜守謬容居召後楊文那敢在王前  
誰能狡兔營三窟深羨神龍襲九淵  
便合從公下吳會濟時無術擬求田

張子華屢為唱篇有詩要余為首唱次韻謝之二

首

百篇無一可譏評落紙銀鉤慕伯英  
足蹇向來甘後乘敵勅真合避先聲  
探驪君每珠先獲類鶩吾慙鵠不成

十五大都須趙璧無勞鼠璞換秦城

詩名宗黨不虛傳又復春容見大篇  
李蔡名甘居廣下照鄰文合在楊前  
盤斜敢下長鯨釣引路須煩老驥先  
紙貴韋郎一千首不妨頻覓浣花牋

李漢老參政寄和文字韻詩次韻謝之

高誼天涯日講聞欲趨函丈畏深文  
佳言阻聽霏霏屑秀句欣披藹藹雲  
鷓序略同慙晚遇蠻坡竝直記宵分  
中朝多少登龍客應擬沙隄御李君

楚材出示汪廷俊唱和詩次韻



大篇作者鬪春容肯為明時歎不逢通塞任分蝸兩角

唱酬應禿兔千鋒光依日月從初載謂名在蓬瀛第幾

重謂秦聯轡盍歸廊廟去支離容我受三鍾

丞相惠詩復次前韻二首

學道居慙邴曼容典刑今向海邊逢德容璞玉長涵潤

才刃劘刀始瑩鋒養壽不憂潘鬢二趣裝行覲舜瞳重

期公展盡調元手盛取勲名勒景鍾

開函三復似南容入眼清詩左右逢絕唱自應開奧窔

全提誰敢觸機鋒朱弦清越宜三疊寶玉森羅富五重

袖手吟邊無好句冥搜空恨五更鍾

李道士惠詩次韻二首

澤國秋霖漲渺瀰天都久客厭驅馳不辭短褐供萊戲

苦憶長頭課楚辭悵望巾車陶靖節浪聞推轂鄭當時

此身長恐儒冠誤已媿當年學稼遲

秋空目斷白雲飛過隙奔駒激箭馳愛日玉符空著論

悲秋宋玉謾徵辭問天擬決行藏計擇地猶難喜懼時

負郭儻容供旨味窮年衡宇足棲遲

次川字韻



此生休問小行年  
合抱遺經老玉川  
處世長懷方外友  
羨君今作地行仙  
風塵京洛傷羈旅  
雲水江鄉渺接連  
歸夢但隨南鴈去  
嬾追鵬鷲上青天

再惠詩有學仙之意次前韻

紅塵飄轉任吾年  
羞媿丹砂葛稚川  
海上竈鼃誰可駕  
淮南雞犬故能仙  
棄家似欲追梅福  
琢句何妨學惠連  
待爾藥爐丹就日  
御風同訪洞中天

雨中復惠詩仍次前韻

性靈陶冶賴遺篇  
秋水愁看灌百川  
索米誰憐身是客

餐霞還恨骨非仙  
鳥驚急雨來還去  
雲敵衝風斷復連  
好句時時慰愁絕  
仰慙高義薄雲天

又詩有卜荆溪之意雅合鄙懷因次韻二首

短檠心醉養生篇  
擬築高峯看逝川  
野性合休林下鞅  
枯腸常媿飲中仙  
化羝未是左元放  
檄虎先煩顧少連  
何處羽衣從汗漫  
君山陽羨大山千仞水如天

心醉微言九九篇  
浩如滄海翕支川  
著書柱史家傳道  
辟穀留侯世學仙  
蠹簡倦推三豕渡  
長弓那解兩禽連  
極知無用宜幽隱  
杜曲無田擬問天



被召赴經筵途中偶成

度嶺三年歎陸沈一拋城市洗塵襟  
雷霆激石泉聲怒  
烟雨埋雲樹色深  
食肉向無編貝齒  
憂時空有未灰心  
露門勸講高華地  
倦鳥終當返故林

汴上小雨復霽

隄沙不起潤如酥  
坐看飛雲自卷舒  
麥隴人閒牛舐犢  
柳陂波淺鷺窺魚  
殘花糝徑東風後  
碧草黏天暮雨初  
分付榮枯蝸兩角  
濁醪青杏送春餘

伯恭要賦薊林

相門耆舊典刑餘  
戚里豪華習氣除  
游徧雲山行樂耳  
種成香草賦歸歟  
紉芳蘭畹餘幽佩  
辟蠹芸堂有舊書  
奎畫煌煌照林壑  
只應門外看鋒車

次韻李丞相園亭二首

閒築池亭古剎邊  
厭將勲業寫凌烟  
柳湖寄傲王摩詰  
丹縣怡神葛稚川  
樂聖一樽濃琥珀  
平戎三尺舊龍泉  
一丘勿作淹留計  
袞繡歸時席夜前

疏泉斲石寄高懷  
仙藥名花取意栽  
履道醉吟齊步武  
平泉景物付雲來  
菰蒲雨洗雙池淨  
松竹風傳萬壑哀



怪底茅齋頻下榻故時賓客滿翹材

僦居城南人皆笑其陋戲作因以自解

紛紛甲第照清都誰信蝸牛亦自盧未厭囂塵聊近市  
不須高大擬容車窺牀夜月陪清冷入戶風埃痛掃除  
豐屋從來招鬼瞰卻因容膝得安居

題洗心亭次韻

不貯期愁學子山此心分付水雲間臨池罷釣魚同樂  
隱几忘機鶴伴閒為喜經臺依絕境故安禪榻面孱顏  
洪崖仙事皆陳迹戲說遺巾笑李寰

豫章離濟江亭

擬上籃輿趁曉晴不妨小立聽江聲青山合處江疑斷  
野渡喧時潮欲平雨腳又從天際起霜毛偏傍鏡邊明  
綠林未靜煩宵旰敢為龍鍾歎遠行

久客感懷

自笑行藏媿古人歸歟有意坐長貧霜毛不種自生鬢  
雲路無梯寧致身春非秋菘聊當肉冬裘夏葛聽懸鶉  
何當即買扁舟去醉兀五湖烟雨春

夜坐觀書



青燈隻影夜迢迢，賴有塵編洗鬱陶。此事長慙作吏廢，少功又笑為儒勞。行藏老驥思千里，用否九牛亡一毛。端為鱸魚挽幽興，擬飛烟艇破秋濤。

睡起戲書呈葛魯卿席大光周舉同舍諸兄

午夢初殘日未西，西人情節物睡偏宜。花開花落紛無定，春到春歸謾不知。香縷細縈環堵室，槐陰清翳一枰碁。此間粗有超然處，雕琢天真卻坐詩。

春晚即事

風條日萼半披殘，不用登臨意惘然。宿麥吐芒風卷浪，

垂楊吹絮暖生烟。送春鶯友分明語，並水鳧雛取次眠。觸眼風光渾有味，人生行樂且加鞭。

早秋書事

江城暑退葉驚秋，環堵蕭蕭草樹幽。掃盡塵心清似水，靜看人態曲如鉤。一樽楚醴醇無敵，半榻湘波冷欲流。午枕日斜呼不省，夢魂還上五湖舟。

次韻曾天猷贈知宗趙端禮展鉢詩

幾人能信見前因，滿意肥甘豢色身。曾是鼎鍾華貴冑，肯同瓶鉢苦空人。招呼善友明初地，降伏心魔淨六塵。



翻笑花間露醉客空看高冢臥麒麟

送德遠樞密初召赴經筵

長驅敵騎傍淮淝又是忠賢許國時扶義東吳回日穀  
宣威西蜀正參旗暫逢貝錦辭黃閣卻續金華上赤墀  
聯事烏臺餘病骨仰看麟閣寫英姿

舍弟寄和送行詩有倦游之歎因勉之

幾年頭角翳蒿萊今日寧辭盡一杯好向明時聊自試  
莫緣荒徑憶歸來白頭休歎從人後青眼多應爲汝開  
官長及諸司皆與余有舊老去豈堪頻作惡風帆目斷首空回

和人晚秋曰菊

溥溥清露洗殘妝靜倚疎籬暗吐芳不逐黃花候秋節  
笑看殷葉隕風霜寒潭誰致南陽種晚徑宜登靖節堂  
我對冰姿賡雪唱騎驪無計度飛黃

游鳳池寺

鳳去池荒今幾年碧梧翠竹故依然鳴簷流水涓涓下  
排闥羣山袞袞前幸有清風繼蓮社不堪斜日近虞淵  
歸途滿眼春耕了勸課無功媿力田

友人惠猩猩毛筆一枝秃甚作詩戲之



猥毛意重鵝毛贈老不中書一悵然宜付削毫貧鄭灼  
政堪握筆晉僧虔判冥卽合防拋失瘞豕寧甘便棄捐  
瓦硯蓬牕吾臭味禿翁相對且忘年

婢子翻羹

杯羹卓午薦朝餐一飽龜腸亦爾難窮鬼還來調韓愈  
夫人真欲試劉寬尚餘食案非三種早悟官亭鱸兩盤  
傳語廚人莫輟釜不應餓死悔儒冠

李似矩尚書挽詞二首

元禮清門有四龍雲孫遠跨舊家風持荷入侍聲名早

仗鉞宣威節制雄晚歲獨拋塵鞅外高懷聊寄藥爐中  
堂堂玉樹埋黃壤何事凌烟欠此公

只今耆舊幾晨星又失三朝一老成許國忠規關社稷  
絕塵奇表照簪纓祇因鼎裏金丹就無復廷中革履聲  
才大故難供世用空餘拱木翳佳城

胡進彥挽詞

剗煩餘刃發礪刀使節藩符久謾勞腰綬六朝知壽考  
懸車一紀足清高光陰不用悲駒隙溫清無違有鳳毛  
晚綴葭莩公已病送行無路首空搔

十一  
繆晉校



惠彥光挽詞

聲馳太學俊游先膏火窮年味絕編百戰收名丹桂籍  
二麾送老白雲邊心閒要路門無轍歲惡窮閭爨有烟  
全福略無毫髮恨更餘身後一經傳

趙約不遠千里命駕相過中道寄示三詩始和答  
一篇

雪水論交今有誰兩翁華髮映朝衣功名晚晚君流落  
衰病栖遲我倦飛叔夜相思能肯顧子猷乘興卻言歸  
人生動是參商別三復清詩對落暉

七言絕句

題明皇聯鑣圖

風流誰復似三郎竝轡春風輦路香謾說宮中行樂祕  
畫圖千古記興亡

戲題四老堂十首

四老堂中四老人飽經喪亂始收身蒼顏鶴髮團欒坐  
知是時平有幸民  
兄弟當年七葉興精神如鶴齒如冰升沈存沒今如許  
且作隨堂粥飯僧



已是平頭六十人  
江湖身老寸心存  
明牕淨几翻經卷  
深炷爐香答主恩

一派荆溪過枕前  
喜從人境得幽偏  
直疑身在烟波上  
臥送飛帆落照邊

堂後堂前竹與梅  
老人多半手親栽  
何時更作閒花草  
亦遣羣芳次第開

四時花草逐時新  
袞袞年華過眼頻  
景物無窮人自老  
新花應解笑迎人

繫舟長傍柳隄陰  
曳杖時穿竹徑深  
薙草澆花課僮僕

更無餘事可關心

多病經時不著冠  
岸巾長對倦雲閒  
年來衰謝交游絕  
靖節柴門不用關

鷓鴣養丹成鹿養茸  
羣叟對舞傍衰慵  
待看仙骨他年就  
同訪蓬萊第一峯

商嶺偷生計已疎  
橘中樂事亦區區  
洛陽耆舊今黃壤  
會有人傳四老圖

題荔枝亭

色味清香美莫名  
更憐圓樹碧亭亭  
結根得所天然勝



爲對三台第一星

上踐阼公  
首拜相

花塢

意匠潛符造物工  
笑談花塢出榛叢  
風條日萼隨時看  
須信春藏指掌中

桂齋

月裏移根傍小齋  
不惟收子看花開  
擣香篩辣歸春裏  
準擬高人勝士來

蘭室

分得騷人九畹香  
時人不服更幽芳  
小牕低戶維摩室

萼萼奇芬春晝長

夢室

笑取功名指顧間  
歸來心與倦雲閒  
閉關不作南柯想  
睡起香凝金博山

圭沼

方銳新池臥介圭  
水光如玉夜騰輝  
不應只作韓侯覲  
更喜姬公著袞衣

菖蒲澗

蟠根帶石傲年芳  
秋雨春風拂水長  
不用引年勞服食



相公勲業似汾陽

雙蓮閣

小閣幽深枕淺波直疑湘水見英娥不將詩酒頻料理  
奈此風前二妙何

和答錢文高四首

閉門不復過高軒夢蝶悠揚栩栩然睡起杖藜經略行  
靜看鷗鷺浴晴川  
翠翠精思媿鮑宣如如不動契金仙回觀爭奪紛華地  
已老吳蠶不復眠

跡拋朝市不妨清心照空華故自明但憶滄浪時鼓枻  
肯從金谷聽鳴箏

覓句高攀孟浩然藏經遠慕漢韋賢深林小隱成幽趣  
我得為鄰媿子先

和答諸兄弟四首

昔向丹墀侍玉軒略無裨補髮蒼然元非食肉封侯相  
合抱遺經老玉川

三州皇化未能宣山水清奇記九仙白首弟兄長挂夢  
喜聽夜雨對牀眠



門對芙蓉碧沼清蕭蕭五柳似淵明遠聽林壑風鳴籟  
戲看兒童草鼓箏見相如傳注

通塞升沈亦偶然山林高臥更稱賢似聞小築西湖上

擇勝渾輸一著先兄弟各有別墅在瀟湖之濱

族叔祖示四絕句次韻

摧頽病鶴怕乘軒歸路風帆任渺然環堵故能容兩膝  
掃除荒徑老斜川

不樂從軍學仲宣那能辟穀慕飛仙直緣衰病干明主  
夕得南牕一覺眠

衰懷底物能陶寫社舞村歌眼暫明誰似玉人供巧笑  
不勞長笛與哀箏

追陪杖履已悠然把翫詩篇更覺賢局上頻煩問瓜葛  
吟邊端不敢爭先

竹亭詩和韻

直上烟霄碧玉抽靜搖月露冷光浮堂堂勁節冰霜後  
元老如今有壯猷

送客

南渡登舟卽水仙西垣有客思悠然因君相問爲官意



不買毘陵附郭田

罷酒

罷酒尋花涉斷磯  
顛儕猶復強褰衣  
可憐醉眼無分別  
卻把旁邊柳折歸

人惠方竹杖

多病扶筇老自便  
得君方竹更輕堅  
平生正以方爲累  
擬付山僧任削圓

題崔慤畫

風折枯荷蘆葦秋  
蕭蕭鷓鴣上沙洲  
關心滿眼江湖趣

何日扁舟得自由

附錄

故資政殿大學士左正議大夫張公諡議

朝散大夫行太常博士婁機撰議文

議曰嘗謂真儒之用至無敵于天下自古撥亂反正將大有爲也未始不知兵夾谷之會夫子動容變色遂使魯轉弱爲強儒效何如哉國家靖康之後四郊多壘國步未安高宗皇帝撫艱難之運念將圖回經理擇所用人爰有雄雋寶臣以道德緝熙于初載力挽中流共濟



之舟風雲一時自然相感天同神化夫豈偶然故資政  
殿大學士左正議大夫張公經世正君之學淵源周孔  
自少策勳翰墨之場轆轤三光手織五雲踐揚冰清亦  
既極文章禮樂之選上方愒日太平責成輔佐公雍容  
暇豫以應天下之變事物之幾藏于眇繇衆人甘寢于  
細娛而公獨出千慮之表前知如著與蔡曰治軍旅選  
將帥嚴守禦搜人才專意政事之大者凡細微不急之  
務悉付都司六曹俾廟堂惟防秋是圖曰處宮室享膳  
羞服輕煖對嬪御以及視朝臨人之際必思二聖母后

謂淮西兵政不可改謂荆蜀駐蹕爲非宜撫諭京城而  
料敵必入寇初破淮南以命帥非其人所以盡忠竭節  
于干戈倣擾之際惻怛懇到用能輔成龍德遂躋登茲  
非有道德人所爲能若是乎博士婁機得其議則閱讀  
銘誌證以所聞攷按諡法且以文諡吏輯官于寺者以  
議白其長合辭爲然不可易也然公以忠信誠實親結  
主知寬洪之量不見涯涘當言者論斥時相上以章付  
公倚公相矣公竭力爭辯上稱歎其賢且以近世不相  
傾奪者爲無幾蓋公惟務靖國協和羣辟并包翕受尺



寸不棄雖時相意所不快者公悉調護潛爲銷弭上每有不盡用之歎閱十五年王淮時在諫垣上指似宰輔以形貌肖公嗟賞莫及後亦以語阜陵淮卒正鼎席夫能使人主追記遐想于旣歿之後眷眷不忘顧何修而臻此耶搢紳相傳爲美談公未老卽退就閒逸視中興之佐前後幾公功名盛矣鮮克全備獨公優游里居身名俱泰生而望尊歿而禮崇平生無一毫之玷可謂善終如始者矣按諡法道德博聞曰文寬樂令終曰靖今加靖以儷文尤爲當衆從機爲議機曰文且靖議之盡

也其敢有異遂諡文靖謹議

朝散郎祕書丞兼權尚書郎官兼權考功郎官  
鍾必萬覆議

議曰嘉泰元年九月丙子太常上故參政張公易名于部曰文靖于是命考功鍾必萬覆議必萬謹按諡法道德博聞曰文寬樂令終曰靖備是二美自昔實難竊觀國朝故老若李公沆之直道事君變調百度呂公夷簡之沈靜有謀鎮安社稷諡之文靖孰曰不宜維公學問淵源文足垂後孜孜論建合古便今可不謂之道德博



聞乎安于命義正色立朝推廣上心始終一節可不謂  
之寬樂令終乎跡其乞增臺諫以廣耳目所以明君道  
之公論時宰宜專意大政遠謀所以明政體之要念二  
聖之未復請于居處飲食之際莫不致思所以明天下  
之大義應天當以實則謂不可徒恃罪己之詔言路所  
當廣則謂宜加褒擢切至之書方時相之見斥于言者  
也蓋倚公相矣力爭以爲國步未安一月而再論相何  
以繫天下之望其識量宏遠徇公忘私類如此至于夙  
夜寅恭協和羣辟惟靖國是務善類之進當路有不快

意者公悉力調護之歸休里門身名俱泰歷數公之言  
行而揆之以李呂二公行事之迹豈非異世而同符者  
乎大抵易名之典貴得其實告于當時而莫不服垂諸  
後世而不敢議以公平生大節炳炳若此攷之碑誌質  
之僉論太常議是謹議



昆陵集

卷十六

三  
繆晉校

昆陵集卷十六





